

Immiaaqqat aalakoornartortaqanngitsut eqqunneqarsinnaaleqqullugit nioqqutaalersinnaaqqullugillu immiaaqqat imeruersaatillu puui pillugit nalunaarummut (Immiaaqqat imeruersaatillu kulysirimik akullit puui pillugit Namminersornerullutik Oqartussat nalunaarutaannut nr. 16, 28. maj 2002-imeersumut) ilaajunnaarseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Justus Hansen, Demokraatit)

Immiaaqqat imeruersaatillu qillertuusaniittut Kalaallit Nunaanni tamarmi nioqqutaalersinnaaqqullugillu immiaaqqat imeruersaatillu puui pillugit nalunaarut allanngorteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaasilluni qillertuusat aamma kalaallit nunaanni utertitsisarnermut ilaalersillugit.
(Inatsisartunut ilaasortaq Nivi Olsen, Demokraatit)

Inartitsisartunut ilaasortaq Nivi Olsen Demokraatit aalajangiiffigisassatut siunnersuutaa pillugu Siumut isumaqarpoq siunertaq soqutiginarlunilu iluatinnaateqartoq. Nunarsuarmioqatigiinnitsinni ukiuni makkunani ilisimavagut mingutitsinerup kinguneranik qanoq nunarsuarmioqatigiinnut assigiinngittutigut sunniutai kingunerluuteqartigisut. Peqqissuserlu pitsaannerusoq anguniassagaanni eqqarsaqqissaarneq isumatusaarneruvoq. Atoqqiisarnerullu annertusarnissaa siunissaq ungasinnerusoq eqqarsaatigalugu silatusaarneruvoq.

Puujaasat utertittagaanngittut pinngortitamut annertuumik minguttitsisinnaanerat qanga takoreersimavarput. Taama pisoqaqqinnginnissaa anguniarlugu Siumumiit puujaasanik ilutsinik nutaanik eqqussisoqartillugu utertitsisarnissamik periusissiortoqarsinnaanissaanik ataatsimiitsitaliap Naalakkersuisullu suleqatigiillutik suliaqarnissaannik kaammattorpagut.

Inatsisartunut ilaasortaq Justus Hansen Demokraatit aalajangiiffigisassatut siunnersuutaanut qujavugut, Siumumiit suliap matuma eqqartueqataaffiginissaa soqutigaarput, tassami ukiut tallimat matuma siorna isuma taamaattoq ilalereersimagatsigu. Aalajangiiffigisassatut siunnersuutit sukumiisumik inuussutissarsiornermut ataatsimiitsitaliami suliarineqarnissaat kissaatigaarput.

Qujanaq

Laura Táunâjik, Siumut